

四庫全書

集部

欽定四庫全書

集部  
抑菴文集卷七

詳校官編修臣裴謙

中書臣劉源溥覆勘

總校官進士臣楊懋珩

校對官典簿臣劉景岳

謄錄監生臣費元震

欽定四庫全書

抑菴文集卷七

明 王直 撰

碑

資善大夫刑部尚書魏公神道碑

正統九年閏七月廿七日刑部尚書魏公以疾終于家事聞上為之嗟悼遣官賜祭命有司治葬事在朝士大夫亦莫不惋惜致賻奠先是公有足疾詔俾釐務免朝參久之未能愈公嘆曰食君厚祿而不一造朝心豈能

自安八年二月拜疏乞致仕上憐而許之降勅慰諭且  
賜鈔三千貫歸一年而終年六十三公諱源字文淵幼  
而岐嶷喜讀書習於禮節十三能屬文嘗作桂花詩為  
時輩所嘆賞選為學官弟子永樂乙酉以書經領鄉薦  
明年取進士拜監察御史所至舉其職松江知府黃子  
威被誣不能白公為辨其枉浙東傍海民困於魚課為  
奏減之西安大疫民間比屋不能興督有司具醫藥往  
療全活者甚多涼州有寇將大為民患公廉得之亟請

兵殄除民得免害父母相繼卒皆奪喪起任職為御史  
九年陞浙江按察副使未幾召還署刑部右侍郎會河  
南旱饑民轉徙乃命公為河南左布政使至則發倉廩  
以賑民奏免逋賦省繇役及諸不急之務一以安民為  
事民稍稍來歸而雨亦大至是歲有年召為刑部左侍  
郎食從二品祿或言四川邊務多弛廢命公往理之明  
罰飭法衆務脩舉還朝拜刑部尚書獄無滯囚凡公所  
決斷者人人以為不冤時上注意邊事又命往西邊督

察諸將謹防邊以便宜從事遣都指揮李謙守獨石楊洪副之劾奏指揮杜衡等慢令當死諸將始嚴憚不敢肆自天城抵朔州視要險地宜守者凡八分命諸將守之請增脩開平龍門城使高大皆覓以甃庶可守又自獨石抵宣府增致墩堠發開平龍門兵併力為之屯軍免其租一年凡諸大城堡請給神銃火藥嚴為備上皆從之再遣勅嘉勞焉時諸軍有勇壯者依託權豪以避役公悉搜括歸伍中權豪側目一弗顧既而病足不能

朝遂以此致仕大夫君子皆惜其去而亦莫不以為榮  
公忠厚坦亮孝於親友於兄弟睦於宗族而信於朋友  
與人言必依於仁義其襟度夷曠洞然見肺腑事有可  
疑者得公處之衆無不愜意凡公所蒞人至今譽嘆不  
能忘魏氏先居南昌之奉新後乃徙居建昌故今為建  
昌望族曾祖文卿祖庭郁父伯泰皆有德義而不仕及  
公貴祖考皆贈資善大夫刑部尚書妣皆贈夫人公娶  
盧氏有賢行四子鑑鐸欽銓鐸先卒側室石氏生子一

人曰銘女二嫁王景春鄒某適鄒者亦石氏出也孫男  
十二瑛瑞璋瑾環珮珂珪珣琰珉玼公以某年某月某  
日葬于邑之甘泉鄉某山之原鑑來京師謁予告曰先  
人不幸棄諸孤朝廷寵終之禮厚矣惟墓道石宜有文  
以示久遠非先生誰能為敢以請予最知公不可辭乃  
為序述其事而系以銘銘曰侃侃魏公有美在中乘時  
而升事我太宗始為御史職是憲紀爰副外臺表表愈偉  
方伯之尊遺愛實存遂陞秋官人用不寃皇撫萬邦威



制夷狄公往行邊師武臣力雖雄邊城隆隆軍聲萬里  
塞垣纖塵不驚公既勞兵簡在天子以疾而休是謂知  
止邦家之光閭里之榮溘然上征為風為霆甘泉之山  
神道有石揭德振華以示亡極

南京吏部尚書黃公神道碑

宣德十年今天子嗣大寶位臨萬邦顧南京根本重地  
建置百司而吏部為之首宜得謹厚大臣往涖之九月  
以命吏部左侍郎黃公宗載陞辭之日詔進為尚書以

行士大夫知公者莫不譽嘆以為宜在南京八年以老疾求致仕上初不許章四上乃許之歸豐城故第又幾年七十九以疾終訃聞命禮部致祭工部為治墳塋明年十二月廿一日葬于其鄉梨樹岡之原葬已其子儒凱來謝恩闕下詣予拜且泣曰先考之葬朝廷寵終之禮厚矣於今得樹碑神道而未有文敢以請予少於公而辱交已久誼不可辭黃氏於豐城為大家公曾祖仲軒有隱德祖以仁考子貞以公貴俱贈吏部侍郎進尚

書妣皆贈淑人進夫人妻余氏亦累封至夫人公自幼喜學年十五已能為里塾師選為郡庠弟子從熊伯機受春秋遂取進士為行人謹於自治奉使四方未嘗受饋遺歷左右司副為司正以父憂去治喪無違禮不飲酒食肉者三年服除領舊職永樂癸未以賢舉授湖廣按察僉事時湖廣諸道惟銅鼓五開最難治分巡刷卷者多憚行蓋天下巨姦宿猾皆謫戍其間善舞文弄法興事撓官府而陰把持其短長往者欲稍按治即糾結

如沐漆不可解欲一切漫漶則見嗤無可奈何多避不肯往公至當刷卷即毅然治行到武陵問風俗知其人苦於從軍女子惡為軍婦不果嫁男子則慮婦家往從戍而以徭賦累已不果娶至年三四十猶獨處公召鄉老里正諭以人道大端俾轉相告語務嫁娶以時不踰月成婚姻者三百餘家他縣聞風皆樂從俗為之變乃榜諭銅鼓五開諸姦豪數其罪惡且發其善端曰不改必寘之法衆知公務以德化人皆相戒勿犯比至莫有

干於理者丙戌徵詣文淵閣脩永樂大典書成受賞而  
歸戊子朝廷以海運糧餉赴北京下湖廣造海船四十  
九命擇風憲官之賢且能者蒞其事衆議以屬公而工  
部所遣官務苛察生事將聞于上以銜能公鎮之以靜  
消其毒螫而落其機牙得不擾而成功己丑車駕將北  
征遣都指揮吳玉徵兵湖廣玉暴貪失期上謂按察司  
官不糾劾於是公與同僚皆坐累謫楊青驛公處之如  
平時遣一力受役而躬自執爨未嘗有不豫之色暇則

閱書史以吟詠自娛癸巳復起為山東道監察御史侃侃自持不肯少貶以徇俗乙未上親策士於廷時鴻臚無卿丞張斌任事恃城守功最狠戾多所中傷人頗憚之以不與讀卷至爭論上前不已公奏斌不學無識不可以讀卷乃敢煩瀆聖聽如此當伏法士論壯之丙申命巡按交趾交趾城中諸軍營房覆以茅故多火公廉知軍民歲歲伐材陶瓦備官用然皆以資權豪命三司幕官稽其數凡有取者皆著于籍由是無敢私費不半

年營房皆易以瓦覆火患遂息時工部尚書東萊黃公福掌交趾藩憲二司才行過人而不事邊幅御史往者多庸常視之至公獨恂恂恭謹而法亦不廢及歸行李蕭然無交趾一物東萊嘗語人曰吾久居此所見御史多矣唯宗載知大體己亥丁祖母憂居家有旨奪情授貴州道監察御史益謹禮蹈義遇事必究極是非不曲隨苟止於禍福利害不計也故再陷刑辟而賴公道以免甲辰宣宗皇帝正位東宮妙東宮僚職輔導擢詹事

府丞未幾陞行在吏部右侍郎時少師蹇公猶兼領吏部事多倚公公協力一心進退人才必付之公論不苟為異同故一時號得人洪熙元年賜誥命制詞有清潔平恕恭謹厚重之褒是年遣祀夏禹及南鎮會稽山因賜鈔八百錠俾歸焚黃于墓下其後嘗奉命往浙江理軍政及伐宮殿大材於湖湘設施措置舉不失宜故事集而民不告勞久之遂有南京之命蓋上知其老而欲安之也南京雖無銓選之勞而勞於馭吏蓋其人多邪



巧才見害必避見利必趨往往冒法以僥倖公正已率  
物無少回撓屹然如大山喬嶽不可撼陰陽闔闢風雲  
雷雨以榮悴百物而細大不遺其施博矣已未進階資  
政大夫詞曰寬和有執廉靜自持又曰小心慎職始終  
不渝人以為實錄當是時公卿大夫齒德之盛莫如公  
及致仕而歸猶康強無恙士大夫出錢都門外瞻望咨  
嗟漢之疏傅不過也公既孝於親尤篤於二兄仲氏宗  
曼有孤孫承裔貧苦不能自立公命其子文凱儒凱收

養之文凱先卒獨儒凱繼其家及公歸即為承裔治居室使仍守舊業毋廢墜其施於鄉族細行之美尤多茲不載姑序次其大者俾刻諸神道而系以銘銘曰在太祖世經術取士公乃奮興以克有位於皇太宗復舉用公揚于外臺以肅庶工出入中外有勞有烈人望謂何邦家之傑遂丞詹事遂佐冢卿式展其猷以宏厥聲天官之尊天子所命殿于南京亦罔不正祇事列聖殆五十年殊錫寵褒帝制在焉達尊者三公則兼備哀榮始

終莫與為比梨樹之原嵒嵒新阡刻此銘詩百世之傳

大明追封會昌伯孫公神道碑

自古聖人受命治天下則天必生聖哲之配以主其內  
治然必視夫積善累德之家而後大開厥祥夏之塗山  
周之任姒蓋可見矣今聖天子嗣鴻業理萬邦聖后之  
生實自孫氏正位中宮母儀天下推原祖德厥有明徵  
公諱士英山東濟南府鄒平縣醴泉鄉人也大父七翁  
父復初皆不仕公天性惇厚以禮法自持孝於父母厚

於宗族而輯睦於鄉黨孜孜樂善維日不足人有不給於衣食者則捐資以賑之其或艱難困阨則經營救護甚於為己與人言必依於孝弟忠信見有為非義則委曲誨諭使之徙義而後已平生言行不違於理蓋自少至老未嘗變節易意鄉邑之人皆敬而仰之曰此善人君子也其積累之隆如此是以流慶發祥於其子忠篤生聖后儼體至尊以奉神靈之統開萬福之原天之佑善如此然皆自公啟之於乎盛矣公娶丁氏同邑某之

女實與公同德以中宮貴忠自中軍都督進推誠宣忠  
翊運武臣特進榮祿大夫會昌伯遂追封公會昌伯封  
丁氏太夫人公大父父皆贈會昌伯祖母張氏母高氏  
皆夫人卒於某年某月某日年若干丁夫人卒於宣德  
辛亥九月十九日年八十七勅葬於其鄉陳家莊橫山  
東北原公四子長即忠次蠢兒早卒次魯次智女四嫁  
王友諒高子昇王仕興劉宗禮孫男四繼宗紹宗顯宗  
續宗皆懷遠將軍指揮使孫女四長今上皇后次適陳

禮次朱璽次朱能曾孫男瑄琦璘孫氏之福厚矣惟公  
積累於前而子孫克繼於後故能受恩於朝廷而顯榮  
先太此豈偶然哉忠惟公及太夫人之德實福慶之本  
今荷聖仁賜顯爵得立碑神道而無文以昭示久遠恐  
泯泯或忘乃來請文刻諸石故為序次之而系以詩曰  
惟天明明善類實彰鄒平大宗奕世有光公之淳懿篤  
於為善持之以誠久而不倦孝敬於親厚其戚姻不吝  
貲財以周困貧赴人之急甚於為己忠厚之言出之疊

疊公有賢配其德實同邑里之間靡不敬恭公德在躬  
施于令子克慎以脩萃和儲祉篤生聖后嬪于聖君恩  
典隆施肫肫其仁褒以命書錫之顯爵天臨日彰令聞  
昭灼易曰餘慶書云降祥何千百年愈久彌昌橫山之  
原神道有石刻此銘詩以告無斁

資善大夫兵部尚書侯公神道碑

侯氏世家澤州公之曾大父伯謙大父慶先父大亨皆  
業儒而不仕公諱璉字廷玉自幼端重寡言笑而聰敏

喜學慷慨有大志讀書窮日夜不休凡遇宴樂輒先退不欲以酒廢事先生長者皆以遠大期之舉為州學弟子員永樂癸卯山西鄉試第一遂取進士為行人以善辭令而剛果能斷得名四川雲南廣西諸土官爭地累年不決者朝廷以命公至則按圖誌考故實召諸耆老開誠布公智力貨賂不可移由是皆悅服而罷上亦以為能交趾黎麟請命公輔禮部侍郎章敞往錫封至其境關門低且隘先驅者謂當偃度公止之曰此中國所



謂狗竇也於土人出入則宜今天命下臨不可由此度  
近者驚懼為撤關乃度由是蠻夷益謹禮不敢肆既歸  
毫髮無所受人以此益賢之遷兵部主事塞北阿爾台多  
爾濟巴勒犯邊會昌伯趙安尚書柴車等自涼州分兵出  
鐵門關攻敗之公與有勞績以外艱歸居喪盡禮而哀  
戚加焉服除陞郎中麓川思仁發反詔尚書王驥率師  
討之公在行往來督戰視將校用命以施賞罰賊攻大  
候州公以偏師往援令于衆曰吾視賊氣驕有輕我心

宜掩其不備即麾衆薄之呼聲動天地斬殺無算賊大潰我師益奮與叅將冉保等遂破石甸等十餘寨聞大軍至麓川賊阻截不得通公與保等由高黎貢山晝夜兼程進與大軍合擒其巢穴賊遂平凱旋陞禮部右侍郎賜白金五十兩鈔五千錠綵幣五表裏且錫誥命以寵之贈大父父皆禮部右侍郎祖妣李氏母宗氏皆贈淑人封繼母劉為太淑人妻翟封淑人尋奉勅鎮雲南得便宜從事雲南饑公發倉廩及募富民出粟以賑之

全活甚衆會再討麓川餘黨公引偏師由千崖南甸進破賊子思機發所居寨獲其妻孥輜畜捷聞陞左侍郎賜白金七十兩鈔五千錠綵幣七表裏丁太淑人憂命馳傳奔喪即起復遣行人賜祭官為治葬遷兵部侍郎復鎮雲南築騰衝城置軍衛焉時議以賊子思機發在孟養復命靖遠伯王驥以兵往勦之公與都督張軌分軍抵金沙江造船先濟奪賊地為營於是大軍畢度燬其柵而進賊奔孟養度不能支各鳥獸散去公窮追至

孟糯海子等處不可得乃班師諸夷酋長皆震駭曰自古漢人無度金沙江者今大軍至此真天威也南夷無復反矣還鎮雲南今上即位遣使齎闕嘉勞賜白金三十兩綵幣二表裏貴州饑苗叛攻圍新闕諸衛道梗弗通城中食盡命公總督軍務往征之時普定圍急公自雲南選善射者為前鋒自將至普定疾戰矢下如雨賊大敗圍解遂趨貴州副總兵都督田禮等以兵來會克龍里甕城羊腸楊老今溪諸路新添平越清平都勻諸

圍俱解由興隆而下抵鎮遠皆平定事聞上嘉其功陞  
兵部尚書又進克安莊克西堡長官司時暑雨方盛瘴  
癘大作公得疾昇歸普定醫弗效諸將問疾惟戒以勿  
輕此賊宜整兵進勦無貽患生民遂卒未嘗一語及私  
時景泰庚午八月十三日也上聞嗟悼遣官賜祭命歸  
其柩於澤州有司治墳以葬生於洪武戊寅三月初六  
日享年五十三其葬以是年十二月十二日其墓在五  
門山前先塋之次子男一日爵朝廷以公功命為錦衣

衛世襲正千戶女一許嫁寧山衛指揮胡剛之子長景  
未行孫男三侃偉儀公姿貌瓌傑器量弘深而兼資文  
武仁義忠信之實有諸內功名事業之美見諸外卓然  
為今名臣人之能者蓋鮮矣予念天之生賢必使之有  
為於世俾荷國家之重而得盡其才不徒小試而已也  
今天子勵精圖治日靖四方而公以壯盛之年當戡定  
之託遠大悠久之業不克見其成嗚呼豈非可惜哉予  
與公同朝久相好為最深於是爵來請予文刻諸神道

以示久遠誼不可辭也乃序次其事之大者而系以銘  
銘曰侯氏之先世為儒家自君祖考弗耀其華君早嗜  
學科乃峻擢歷位而陞膺此殊渥文武之才兩取其優  
伐叛南夷克闡令猷偏師疾攻風激霆怒振槁摧枯有  
仆無拒飛度金沙遺孽遁逃煙塵廓清弓矢載橐蠢茲  
有苗乃敢干紀震以餘威所向披靡遂陟夏卿遽返于  
冥維茲戎功弗究厥成天子曰嘻曷表朕志五品之榮  
子孫世繼大山峩峩靈秀所鍾蔚然新宮公在其中勒

銘穹碑負以龜趾詒後不忘庶其在此

重脩開平忠武王廟碑

正統十二年秋八月通州守臣李經言州城東南隅舊有廟以祀開平忠武王常遇春蓋洪武三年奉勅建每歲春秋守臣以少牢行禮庭下載在祀典今八十年矣脩治不繼日入於弊懼無以稱朝廷崇德報功之意請繕完如法制曰可命工部聚材鳩工撤而新之通州諸衛及州所屬縣各以丁夫給役且命總理通州諸務都



指揮僉事陳信兼督之命既下文武吏士奉承唯謹材  
不徵而集工不召而至智者效謀壯者效力作正殿前  
殿翼以兩廂前啟三門旁列廚庫凡諸像設靡不畢備  
弘麗靚深有加於昔經始於九月己酉而以明年四月  
成於是信來請曰是役也宜有紀願書而刻之麗牲之  
碑惟天生大有為之君必輔以不二心之臣肆我太祖  
皇帝受命而興王以忠信智勇佐之飛渡大江霆擊電  
掃東南郡縣以次削平既復下兗豫遂議北征車駕至

汴申命大將軍徐達而王為之副諭以仁義行師毋殺戮以逞天聲所臨無思不服王先至通州禁侵暴務安輯人不知兵市不易肆皆愛戴如父母遂收燕都明年平河東入秦敵復侵通州王還兵拒之通州之人免於荼毒其德王尤深王遂率師破開平大俘獲而歸至柳河州以疾薨柩還過通州州人皆罷市迎哭既去而念之不衰飲食必祭上思王之功而知民之感慕如此此廟之所以作也昔漢之西鄉侯張飛號萬人敵嘗拒魏

將張郃於巴西大破郃軍以安此土巴西人德之歷千  
餘年而廟食不廢今王以雄材大畧佐太祖定天下兵  
威所及王之蹟為多其功烈在朝廷利澤在生民蓋甚  
大較之飛實過之國家褒答勲臣恩禮之厚亦非蜀漢  
可比王生為上公沒有顯號而廟祀永久蓋宜也王之  
廟在京師尤盛此特其別祠焉耳今天子又新而大之  
所以承先德而報王功其超越百代可知矣乃為述其  
事而系以詩曰太祖龍興四海從維王仗劍先來同所

向無敢當其鋒通州亦在破竹中奠安民居遏寇衝播  
灑義澤揚仁風閭閻歌舞靡怨恫旌旗北伐兵馬雄汎  
掃絕漠煙塵空大星宵墜感帝衷錫以顯號昭殊功廟  
食於此罔不恭聖皇繼述棟愈隆神之在位儼儀容調  
和陰陽幹化工疵癘不作歲屢豐春秋祀享無終窮

兵部尚書贈榮祿大夫少保兼尚書鄭公神道

碑

兵部尚書鄭公既卒之明年皇帝悼念不已詔特贈少

保兼兵部尚書進階榮祿大夫而官其子儀為主事儀奉公衣冠以歸將以某年某月某日葬于某里之原而述公之行請文以刻諸墓道嗚呼直公故人也其可辭公諱埜字孟質別號樸齋邨之宜章人曾祖某祖某皆有學行而不仕父子輔為學官縣令名重當時及公貴祖父皆贈兵部左侍郎妣李氏王氏皆贈淑人公早喪母祖母李撫育之見其不凡最鍾愛曰是子能大吾門公孝友勤儉出於天性而撫弟妹尤篤其於學問不待程

勸選為邑庠生而泰和王敬先為訓導循循善教公亦  
勉勉善學學成取進士遂入都察院理刑獄以廉平得  
名永樂癸巳拜監察御史時車駕在北京有言南京鈔  
法阻滯命公往察之衆謂將起大獄公往擒市豪一二  
以歸奏曰市人聞令皆震懼今鈔法已通矣上領之而  
罷倭寇犯遼東公往按問戍守之失律者凡百餘人皆  
應死公為開陳其可矜狀甚明上然而宥之山海關吏  
卒邀阻行人以取財亡逃之人則受賕縱之去弊積滋

甚公廉得之歸之關悉擒治抵罪弊為之省丙申北京  
營造執役之人累鉅萬上念有病者命醫與善藥又慮  
其奉行不謹命公察視之公躬履其地令潔其穢汚而  
時其藥食由是病者多不死戊戌石州人有詣闕告變  
者曰州民與陝人羣聚千餘謀不軌上擢公為陝西按  
察副使往理其事果實即以官軍勦戮毋貽民患賜之  
楮幣給驛而遣之公至察其誣乃反獄亡命妄言異脫  
死即具以聞上命止弗問而誅其造誣者宣德己酉陝

右饑華亭宜川尤甚公私廩皆竭公巡歷其地憂之乃移旁縣粟賑焉羸病不能興者命官府煮粥食之民以全活庚戌至納潯憂歸道聞父喪哀愈甚每號痛輒欲絕其治喪一用古禮其祭亦如之服除拜應天尹輦轂之下賦急役繁公一以養民為務事無大小苟可以興利去害無不用其心至於市征田稅皆酌其平豪猾不得為輕重賓興之歲公設科取士厚其禮而峻其防得人為多且撙節其費以待會試故事集而民不擾視異



時蓋省十三四歲大熟麥有兩岐者民歸德於公公拒弗受正統改元進拜兵部左侍郎時西鄙有警尚書王公徃視師公獨任其事上嘉其才荆湘民多隸戎伍公家亦與焉至是特除其籍以示寵己未京師淫雨壞官民廬舍公奏曰此陰氣為沴兵陰也皆臣等不職所致乞罷歸田里上慰勉之師征麓川公舉蔣貴可任卒有功衆人以為知人天下軍衛總小旗當代者於例必就試京師有道遠無資不能來者終身不得代公請各於

都司試之人以為便時有言欲變易軍伍使南北之人  
各適其土性下羣議衆依違其間公曰此舊制不可紊  
稍有變易將不勝其弊咎將誰歸卒不動嘗自念曰治  
軍吾職也當為國家惜其力養其銳氣以備不虞故凡  
軍家利病有當興革者必為上言之多見信從己已邊  
報敵入寇上命治軍旅而權姦獨主親征不與外廷議  
及詔下大臣皆以為不可即上章請留不聽公從行出  
關屢奏言此小醜不宜屈至尊惟指麾諸將足以成功

不聽權姦惡其數言事欲踈之勅公與戶部尚書王佐  
隨老營至懷安墜馬幾殆從者請少留懷安就醫藥公  
曰天子在前吾為大臣豈可託疾求自便力疾而往至  
雲中車駕回鑾然行止疾徐惟權姦所命至宣府敵兵  
踵至公深以為憂再上章請疾驅入關而嚴兵為殿皆  
不報最後公詣行殿申前請權姦怒曰汝腐儒安知兵  
事再妄言必死公抗言曰我為社稷生靈而言何得以  
死懼我權姦愈怒叱左右扶出公與王公相對泣帳中

明曰次土木營中無水士馬皆饑渴敵四面集矢下如雨衆奮欲戰又為權姦所沮湏臾師覆公遇害蓋八月十五日也生於洪武乙丑某月某日年六十五娶吳氏有賢行子男一即儀女一嫁同里士人歐陽瑄孫男三琦琳珍公學博行莊仕宦四十年風裁凜然見重於士大夫威行惠施近悅遠懷服仁蹈義至老不衰此其平生大節也權姦誤國而卒陷焉豈獨公之不幸哉嗚呼銘曰允毅廊公逢時之隆學古入官薦躋顯庸執法在

朝為名御史再陞外臺其行愈偉京尹堂堂百郡所瞻  
惟少司馬戎律有嚴遂陟夏卿君子所重噫其逝矣云  
誰不慟人道之大曰義與仁仁義不違何愧於人刻文  
墓碑負以龜趾永永不亡庶其在此

贈少保兼太子太傅工部尚書東閣大學士高  
公神道碑

公高氏諱焯字元昭其先河南懷慶人從宋南渡居泰  
州之丁溪高祖彬曾祖明皆有德善而不仕祖椿字壽

之元季徙居蘇州張仕誠據蘇州州人多為用獨能以禮自防不苟應徵辟戒諸子曰彼無遠圖不足與有為汝曹當讀書待時而動洪武初復徙興化故公為興化人自幼有節槩志尚高簡篤意教子必由於義依於仁其教閭巷子弟亦如之多所造就洪武中鄉人蘇价為鴻臚丞欲薦用之公以守墳墓不可去力辭平居喜振施見人有急周之惟恐不至嘗渡楊子江有舟敗者資皆沒溺栖栖然無所濟公即探囊中金與之泰州儒士

陳景文當行成而貧無貲至鬻子以自給公捐金贖還之俾父子得全又嘗過市見受刑者屍暴露公解衣覆之而去人笑其迂公曰吾不忍見此迂者固如是也公兄弟四人皆邃於學而敬愛尤篤伯兄元吉洪武辛亥試藝高等歷興化湖口二縣教諭終廣東樂昌簿次元暉以明經舉授平山丞既滿陞工部主事卒其三則公四則元昕深於易能以易數推吉凶禍福然與人言必主於孝弟忠信未嘗涉非義公事二兄撫季弟克盡其

道極怡愉之樂兄沒事寡嫂如兄在時嫁孤姪女不異  
於已女宗族鄉黨重其義因稱為義翁公亦因以自號  
性好遊而喜吟往來吳楚湖湘江浙晉趙之間遇山水  
奇勝及前賢遺跡輒徘徊登覽而見於吟詠清新典雅  
有唐人風致名其集曰聽雨藏于家公娶王氏松江望  
族有賢行凡公所以惇孝弟睦族嫺惠困窮而遂其惻  
怛慈愛之施者多其助也三子孟曰永仲曰穀季曰稷  
孟季皆務學為士人仲取進士致通顯歷官翰林春坊



今為少保兼太子太傅工部尚書東閣大學士其文行  
政事表然為時之望天子嘉其賢而推原所自出公既  
封贈春坊司直翰林學士工部侍郎今又加贈公而上  
及曾大父大父皆榮祿大夫少保兼太子太傅工部尚  
書東閣大學士妣皆夫人此豈偶然之故哉皆盛德之  
應也公以某年某月某日生而卒於某年某月某日享  
年闕十其葬在闕之原少保篤念先德蓋久而不衰  
思表諸墓道以傳於永久而猥以屬予不腆之文豈足

以揚公之盛美而慰孝子之心哉然不可辭也故序次其事而系以銘俾刻焉銘曰高氏之先家于覃懷守室南遷遂與偕來于泰于蘇興化三徙不詭不隨既多受祉維公承之益展厥謨原有田廬堂有詩書祖考之孝兄弟之義困阨危亡亦克用濟偉矣令子為孤為卿在帝左右以贊國成帝曰休哉其來有自寵贈及公一品之貴命書煌煌式降自天惇本濬源恩禮備焉佳城哉我公安于此靈秀所鍾以利後嗣維德之茂啓慶在茲

刻此銘詩百世之詒

故驃騎將軍都指揮使徐公神道碑

公徐氏諱闕字闕世為和州烏江人國朝受命之初公

之父闕自闕萬戶軍中攜公來歸雖少而器宇不凡英

銳果敢迥出儕輩上洪武丁卯以來數從大將征金山

伊瑪河又征哈勒哈伊都山及寧下皆有功簡隸燕山

右護衛為十夫長太宗皇帝舉兵靖內難置勇士一軍

公在選中克懷來雄縣莫州攻圍真定以功陞隊長領

五十夫從克大寧戰鄭村壩功多陞勇士百戶又從取  
廣昌下蔚州圍大同鏖白溝河遂圍濟南陞副千戶從  
攻克滄州合戰於東昌又戰威縣皆大捷時真定軍邀  
我歸路公以歸師擣敗之又從戰夾河戰藁城進攻順  
德彰德遂攻西水寨功最超拜指揮同知又從下東阿  
東平汝上戰肥河戰大店皆捷又戰小河公深入陷陣  
連殺十餘人敵衆辟易莫敢當忽大風塵起軍亂公猶  
奮槊直前呼曰男兒當於死中求生會馬蹶沒於陣太

宗皇帝深惜之永樂元年大封拜嘉公勞績命官其子  
恭陞授金吾右衛指揮使俾子孫世襲父闕贈昭勇將  
軍指揮使妣蔣氏配李氏皆贈淑人上念小河之戰而  
嘆公等之勇烈加贈驃騎將軍都指揮使蓋異數也公  
剛正質直沈贄簡重不妄言笑與人交篤於信義閒暇  
惟講習武畧未嘗慢戲佚游諸軍皆目為長者勇士一  
軍上所自將俱才力過人不畏義死而公尤號魁傑每  
臨陣大呼先登衆從之所向披靡衆或稍後輒瞋目唾

罵曰丈夫當奮前以死寧退縮苟活邪蓋以死勤事乃其志云死之日洪武壬午四月某日也年闕十有子一人即恭初自金吾右衛指揮使領親軍以才行重當時娶郭氏故武定侯追封營國威襄公次女孫男二光輝恭既葬公衣冠於縣某村之原而慮其功德不顯於世乃因鴻臚卿楊思敬請於予曰先人効勞國家歷官三品加贈至二品受恩厚矣於法得立碑神道敢請文以刻焉予謂自古豪傑之士有志於當世而能遇主以成

名者少矣遇主以成名而泯沒無聞此則其子孫之過也公之所立誠無愧於古之豪傑而有子孫汲汲以圖其不朽是可謂賢也乃為序述其事而系以銘銘曰允毅徐公逢時之隆奮自我行以奏膚功太宗龍興雲蒸霧翥公於其間實百其勇天戈所臨無役不從維霆維風維虎維熊戰則必勝攻則必取摧兇抑強克致其武鏖於河湑煙塵晝昏氣欲盡敵義不顧身公往不還天子興喟何以報功二品之貴公之餘慶其流則遐賢子

令孫足興其家有封在原有碑在側刻此銘詩垂耀無極

故通奉大夫戶部右侍郎焦公神道碑

正統己巳五月廿一日戶部右侍郎焦公以疾終于家  
年五十八先是詔以叛賊思機發猶不庭假息孟養命  
出師征之而以公主餽運抵金沙江公奉命謹甚冒瘴  
癘以進軍不乏食而身則病矣然尤力疾終其事師還  
遂浮三峽道荆襄以朝京師公家南陽葉縣以困憊弗



堪少止求醫藥而疾加劇不能就道即上奏曰臣餽師  
無功又不善攝養為瘴癘所侵今瘡復作連項背勢且  
日甚恐不得入朝見陛下謹具奏復命踰數日計至上  
深悼惜之命禮部致祭工部為治墳塋子鈍卜某年某  
月某日奉葬于某山之原而以翰林編脩劉定之所述  
行狀來請曰先人之葬朝廷寵終之禮厚矣然官至二  
品於法得立碑神道敢請文以刻焉公諱宏字克明世  
為葉人曾祖成祖敬皆不仕考英嘗主郡及萍鄉二縣

簿公貴祖考皆累贈至通奉大夫江西右布政使祖妣程氏妣耿氏皆贈夫人公天性至孝事父母皆盡其道居喪皆哀毀如禮其於為學日夜不懈學成取進士拜監察御史守正不阿時都御史顧公馭下嚴御史有不謹禮法者皆罷斥獨善待公嘗出按貴州貴有疑獄不決論死者百餘人公察其實以聞皆釋免坐者十人而已公署相傳有妖前之御史皆避正寢不敢居公處之恬然陳都督鎮鳳陽行有違法者人重誣之欲寘之死

地宣宗疑之命擇御史之賢且明者往廉問以命公至則為直其誣而坐以所當罪得不死謫戍邊由是公日益有名人有受誣不能白者皆以得遇公為幸壬子陞江西按察副使人謂江西俗健訟公曰吾知人多讀書識道理吾當以理論之訟無難決者於是人有訟唯折之以理不尚嚴酷人亦感公之德無不服從獄遂清省江西連歲歉積逋稅藩府病之吏部侍郎趙公任總督奏以委公公撫循勸諭民懼趨之事以辦治己未陞

江西右布政使益以寬厚為治察下吏之有才行者奏進之有起自末僚而為縣令者九江歲納蘆柴而其地不產乃斂錢於民買自他所以納焉逋負歲積民益困公為奏免之新南昌府學脩公署正堂及吏舍皆捐俸以倡僚屬故不勞而集每以公事行縣寬而不縱嚴而不殘吏畏而民愛之尤喜興學舍獎進士類九江瀟溪書院久廢人侵軼其地公復之建祠宇以興起其士人郡邑之中有寒畯不得齒於學公羅而致之禮遣為弟

子有與鄉薦而貧不能赴春官者公皆厚禮送之由公而成名者衆歲辛酉徵為戶部右侍郎食從二品祿有重事則以任公閩浙蘇松半臨海寇往來海中伺便肆抄掠兵備弛廢上命公往視閱諸軍脩城堞備戰艦防守之法有當因革增損者悉以便宜從事政令一新寇不得為害蘇之嘉定民有田數百畝已歸之官而稅尚在民民苦之公請蠲其稅甲子閩中復開銀場又命公往視課額重者請減之以利民乙丑上以陝西緣邊皆

宿重兵俱仰食內郡河南濱陝多積粟而諸衛多屯田  
慮有名無實復以命公公按視其廩庾考較其耕穫姦  
弊盡革儲備以充其他建立之可紀者多類此蓋公盡  
心朝廷遇事勇為為之必盡其方不擇利害為取舍與  
人交謙恭和厚言語恂恂有不當其意輒毅然自任不  
可回於得失不較也公為人如此上之欲用公與士大  
夫之所以期望者蓋有大於此而今已矣豈非深可惜  
哉公兄弟三人最相愛長兄寧早卒公撫育其諸孤以

家事屬仲弟宜令季弟寬得專意於學寬遂與鈍亦相繼取進士而寬為御史焦氏世科之盛人罕有及者公娶同邑李氏累封至夫人子男二長即鈍次欽女四長適西銘次適李容餘在室公以文行政事為當時顯人而子又克孝用表著於後庶永永不朽子家江右素知公且同朝久相知益深奚可辭故論次其事之大者系以銘詩而俾刻之石銘曰天佑聖明篤生俊才侃侃焦公乘時偕來為名進士為賢御史正直自持譽聞遠邇

出副外臺亦克持平教行恩施刑為之清遂陞方伯召  
公是武亦有詠歌叶于南國天子曰來汝佐司徒邦之  
大計汝審厥謨出入中外有勞有烈天不憖遺惜哉此  
傑命之不延人亦奚悲功立名存百世之思刻文道周  
負以龜趾云誰為之公實有子

處州太守李君墓碑

李氏世居泰和南岡里蓋唐西平忠武王之裔元栢興  
路同知英叔英叔子皆春皆春子南安推官如春如春



生伯昂則君之高曾祖考也伯昂娶胡氏而君為第三子  
子在元李氏以貧富為大家經亂盡失之君幼從父學  
雖貧而器宇偉然英敏出儕輩既長學日益進連不得  
志於有司洪熙初以賢舉授清河縣知縣清河縣小而  
當衝要官舡餽運赴北京者日相銜役夫動以千計前  
之為縣者不能辨言於朝得沭陽五百人為助然去家  
遠窘於衣食至是君請以清河人代之而令彼代輸清  
河浮徵三之二兩縣皆便焉官船主者每以役夫善逃

為名收其衣資掩有之役夫有寒餓致死者君命各為  
牌書其目納於主者收放以牌為驗害乃免清河民好  
乘夜縱火或發塚以逞忿君為教戒之詞十三條俾各  
里書於夫牌篤實者掌之每朔望警訓焉且令書其民  
勤惰善惡以聞俗為丕變宣德中歲旱民艱食飛蝗蔽  
天君禱于城隍神而蝗不入境滿九年用禮部章侍郎  
薦陞知蘄州清河民五百餘人詣闕乞留命以知州理  
縣事縣民有湖田數百頃淮安衛卒奪其利民代輸稅

者六十年君為奏之詔覆實以還民民有困饑攘人一  
牛殺食之事覺御史以為強盜一家應死者八人君曰  
以八人償一牛情實可矜言之上六人得免死留守衛  
卒有姬泰者自福建還挾重貲為同舟所害過縣以病  
死告異得公文以自掩飾君疑不予使人廉得實情發  
其姦舟人皆伏法清河在兩京間東南之人所必由道  
死而不葬者何限君憫之鄉民有應役于官而需次者  
日遣十數人人給米一升俾收遺骸為三大塚葬之縣

民有事不遣卒追呼但與為期皆自赴有爭訟者以理諭之令退省以俟命多感服而罷治清河凡缺年視民如子淮水屢漲淮民屢絕粒君亦屢請于上官願及時賑濟若俟奏報民殆盡淮民賴其惠歲饑民無以輸稅而官府急催科淮南北之人皆鬻兒女君又言之上官當緩催科急賑濟以固邦本淮民兒女皆得完於是皆愛君如父母丙寅詔舉賢為郡守刑部尚書山陽金公以君薦命知處州使者持符至清河俾即上道一邑之

民無少長愚良皆流涕願留而不可時處州亢旱君至而雨民大悅進耆老問風俗禁民間生女不舉有喪不葬而焚棄者擇城北閒地數十畝為義塚葬遺骸凡無葬地者皆許葬其中民大化服方詢察利病次第罷行之而疾作矣以正統丁卯五月八日終于官舍年六十三蓋在郡僅踰月而已凡諸同僚及郡之士民感君之德而服其教哭之皆哀謂非君之不幸乃郡人之不幸也君事親孝當貧時授徒以資養甘旨不以進不先嘗

父卒葬祭必以禮而事母尤篤嘗迎至清河縣就養忽得風疾君每出臨政戒妻子謹護視歸則躬侍左右進湯藥夜卧榻前承候起居踰年不少懈母性嚴多躁怒怒則益恭衣冠跪以聽命至竟日達旦怒解乃已兄弟相友愛平居惇睦無間言當疾大漸惟子遇并孫鎬在側語曰汝曹宜讀書為善無忝父母既又曰吾死無所憾惟老母八十三康健在堂而不得終養此吾所憾也吾豈能瞑目於地下哉語訖悲不自勝君天性篤孝至

死猶不忘如此娶蕭氏又娶徐氏子男三長武沙縣訓導次遇皆蕭出次弁徐出也女四嫁周謚胡質張威龍京孫男鎬鉅鉞遇等奉柩歸以正統十二年十月初五日葬於廬陵永福鄉英村之原至是遇來京師以所述行狀泣請曰先人今既葬矣維其德善先生實知之敢請文以揭諸墓道庶永永不朽予念與君交好三十年相知為最深其美不可以徧書為序述其大者系以銘俾刻焉銘曰李氏之先系出有唐綿綿相傳盛于西昌

栢興南安式濟其美迨君承之表表愈偉清河之政聞  
於兩京既隆其功亦著其名蚩蚩者氓奚信奚慕維仁  
之從維義之附千里郡寄未竟厥施天弗憖遺其誰不  
悲漢紀循良周歌豈弟是究是懷曷其有已英村之原  
鬱鬱新阡靈秀所鍾君墓在焉斲石道傍負以龜趾刻  
銘垂休作者太史

河間太守廖君墓碑

廖氏故泰和儒家君曾祖自強先生元臨江教授以文



名當時祖叔章不仕父潛仲海康教諭皆有學行君其次子也諱謨字文績幼讀書穎悟過人學成取進士選為翰林庶吉士聲譽日起以外艱去服除授穎上令為民去弊興利民德君太宗皇帝征沙漠君督餽餉時事有違誤者以軍法論君能得民心獨不勞而事集丁內艱改長沙令長沙賦繁役重民苦之君撫循勞來出於至誠遇事必思所以利民者長沙交廣要衝方南征時諸中貴人及大臣要官經畧其地與夫輸送之往來者

相接于途君承上撫下曲盡其宜民賴以不擾旱則躬  
禱雨輒應邑有虎為害民設機穽不能止君禱于神虎  
為之屏跡士大夫歌頌焉秩滿陞刑部主事明慎折獄  
尚書魏公嘉獎之舉為福建按察僉事閩去京遠且富  
饒為吏者多不檢君獨持風裁衆稍畏戢然亦思中傷  
之及捧表來京師道建安遇雨買雨具令慢君君笞辱  
之反誣君損直縣人有為達官者惡君辱其令左右之  
左遷君河間同知君持已治民一如為令時吏畏其公

民懷其惠守缺僚屬奏願君為守民伏闕請者亦數千  
詔從之治河間凡八年人親戴之如父母正統戊辰八  
月初十日卒於官年五十六娶陳氏先卒一子曰京早  
死女三嫁彭適張曾質又娶許氏四子潁湖安泰湖舉  
明經為深州訓導孫男二子兩家居相近君曾祖教授  
先生與予先祖尚書公有斯文之契而予少時又與君  
之先考教諭先生同游鄉校最相好見君幼時聰敏英  
發最奇君及君廷對予讀卷殿廬得所獻策而進之君

在高等選入翰林學古為文章其才思湧出千百言可  
立就見義勇為不擇利害為趨舍為守令治績皆無愧  
於古人其賢如此而不至高壽以卒嗚呼惜哉君之葬  
以某年某月某日其墓在牛路山之原當樹碑神道故  
予為次第其事而系以銘詩銘曰猗嗟廖君有學有文  
才超乎當世行配乎古人不六十年而歸諸氓刻辭垂  
休愈久彌新

文昌閣碑

延真觀文昌閣者道會戴用拙之所修也初用拙祖師  
康浩然捐重貲為此閣高大之觀臨一州既足以奉神  
祀致休祥而州南山水之美林木之繁可一覽而盡士  
大夫樂與遊及庚子之亂燬焉其後因故地為庠屋十  
數楹以居其徒不足以稱前時之望其師蕭務玄奮欲  
新之未遂而化去至用拙領教事遂以興作為己任前  
道會彭海雲則其師之兄也亦力贊其成用拙乃罄已  
貲與其徒走湖湘市大材邑里好事者又隨多寡出錢

助之經始於永樂十四年缺月至十六年十月而閣成  
前後為屋各三間高三十尺廣二十六尺深視廣加二  
尺馬東西傍為二閣以通往來其高深如前之數而廣  
則減十尺環傑堅好不異於前土木采章極其輪奐邑  
士袁仲愚繪文昌帝君置其中正像一旁像二香花鐘  
鼓朝夕嚴祀焉世傳神生於成周歷秦漢唐宋皆有顯  
蹟以忠孝存心以仁恕及物至謂士大夫之貢舉而神  
亦司之然其所以陰為予奪者必視其德之盛衰此載

其書者然也神之為道如此誠古所謂盛德必百世紀而非其他出聲威見光景以驚動禍福人者可比也而用拙所為道以清淨為宗以無為為本顧乃切切於文昌而尊祀焉以自合於吾儒豈非賢乎雖然吾邑之人以文學奮身而成功名享祿位者豈專以神事為哉盖上有聖文神武之君下有好文興學之俗而神之功化並行其間此其所以盛也用拙清俊拔俗有才行予嘗與之從容知其能有為者至是請書其事於石以貽久

遠而凡出財力者則誌于碑陰予不能辭也乃為書而  
銘之銘曰白鶴之山神所宮寥陽宮殿煥當中偉哉新  
閣勢愈雄壁房貝戶相玲瓏文昌帝君儼德容百靈後  
先紛景從鐘鼓列祀甚嚴恭玉虬為駟雲錦幃飄然御  
氣超鴻濛注為甘澤流祥風疫癘不作歲屢豐萬姓鼓  
舞歌時雍茲邦文學鄒魯同九霄翼翼爭攀龍司其祿  
秩榮乃躬以德為行福亦崇惟神居此無怨恫玄化默  
佑駿且洪皇猷丕顯吾道隆千秋萬歲神之功我為銘



詩垂無窮

三茆山崇禧萬壽宮重修三清殿碑

三茆山崇禧萬壽宮重修三清殿成道錄司右正一湯  
公希文以其成之不易也偕其徒華陽副靈官兼本宮  
住持丁與明具事之本未來求予文以刻諸碑三茆山  
者古勾曲山也仙經所載洞天三十六而勾曲居第八  
曰華陽洞天福地七十二而金陵地肺福地為之首則  
勾曲之山信天下之靈境也漢茆君兄弟成道於此而

山遂以茆姓顯晉隋梁唐以來茆君之道益彰徹大行  
嗣而傳者彌衆歷世相承館宇鱗次凡十有二而曲林  
館為最陶弘景居之其清德淳行高風絕俗當敬禮焉  
至唐其高第弟子王遠知妙契玄理道德崇高識太宗  
於龍潛時由是深加眷獎賜所居額曰太平觀而改創  
焉累代因之益加崇飾宋之時有朱自英宗師者至道  
妙用感則必通為章聖皇帝祈嗣獲靈驗復改太平為  
崇禧迄宋之世致禮不衰元延祐間特進上卿玄教大

宗師崇文弘道真人吳全節以崇禧觀神明之妙聞於上詔賜號曰崇禧萬壽宮凡有禱祀以福國裕民必至是宮宇之盛蔚然為神仙之居他莫之能及重紀至元丙子歲主者弗戒燬焉於是高棟廣宇峻級崇臺皆化為荆榛瓦礫之場蓋百二十年矣興弊起廢莫有少繫于心者湯公初為靈官于茲雅有志興復然以前代治此宮皆本於朝廷而有司任之故極其盛如此今草衣木食之流而欲興是役豈非難哉然不敢不勉乃盡出

其貲以舉事而首命陶為瓦甃二十萬有奇其他材用亦次第營辦會有言公道行峻潔宜在師表之地詔徵入道錄司典教事而志未克遂與明實受教於公夙夜祇懼思有以成公志乃白其事於冢宰曹公義及守玄冲靖秉誠專確志道衍教妙悟靜虛弘濟真人邵公以正曹公句容人知崇禘事為詳邵公亦掌道教事聞其言而嘉之皆助白金百兩凡好道樂施之士各以多寡助焉遣弟子丁玉輝市材於姑蘇歸至毘陵筏重水溢

不得上衆患之忽江水盛長風大發一夕飄筏至山之  
西陽橋下人皆以為神助云乃集羣工度衆材脩短巨  
細各中程度莫不備具工善材良並手偕作經始于正  
統十四年十一月二十日而以景泰四年秋九月成正  
殿以間計者七其高六十六尺有奇東西九十六尺有  
奇南北七十六尺有奇崇深廣大之觀金碧輝華之美  
蓋於昔無愧奉三清之尊於其中香花鐘鼓朝夕嚴事  
山川之靈悉有喜氣雲霞發色草木競秀人亦莫不稱

其能夫天下之事以得人為本苟得其人則雖難而成不然則事雖易亦未有能興起者宮之廢久矣遠近之人智足以有謀勇足以有為而富者足以給其費然卒至于今豈非必得人而後能有立歟三清者道教之所尊也居之而殿祀焉蓋立教之本崇道之基也然則湯公與其徒之建立如此則道之隆教之昌將不與古昔並美乎公年益高德益茂虛靜專一澹然自守與明聰倍秀偉敏於求道而繼志述事為尤篤觀於此可見是

不可無文以傳於後世使其成之難而相與維持於永久故為書其事而繫以銘詩俾刻焉銘曰勾曲之山矗竒形洞天福地自古稱崔嵬秀拔開翠屏盪摩日月揚光精茆君上仙駕雲輶玄化顯赫徵庶氓瓊宮玉宇高崢嶸晉隋梁唐及宋興詔賜華榜增寵榮崇禧萬壽无與名一夕不戒遺榛荆毅然起廢人鮮能皇明運泰道乃亨維茲湯公秉一誠勤苦介持殊堅貞經始未就來神京嗣師清脩曰與明夙夜不懈思繼承守玄真人

天官卿揮金捐幣衆與并三清之殿歎告成元氣混合  
神所營搗鐘考鼓轟雷霆君來列侍擁萬靈虹旂霧蓋  
霓為旌奇氛異靄充紫庭下憫俗世勞其生錫以諸福  
流祥禎疵癘不作皆底寧百穀蕃庶歲屢登醉飽鼓腹  
歌太平丕昭神貺弘厥聲穹碑深刻載我銘揚輝耀美  
三千齡

論

論曹參




漢曹參代蕭何為相國而後世稱賢相予疑之古者大臣之相國也必思為國建長久之業於道所當為者夙夜盡心不敢少怠焉而況輔新造之國乎周公相成王用文武之道治天下有不合者夜以繼日而思之及其得也又坐以待旦而行之其勤也至矣當時之臣莫有過於周公者而周公方吐哺握髮以受其官故能興道立教維持周室至八百年之久此豈苟且偷惰者所能哉蕭何佐高帝定天下聞其次律令矣他未之聞也曹

參代之守何之約束日飲醇酒不事事士大夫欲有論  
諫亦飲以醇酒使醉不得言嗚呼其亦異乎周公之所  
為矣何素不知學其相高帝於夫治天下之道未有所  
立也就使有所立尤當敬守而慎行之以維持於遠天  
下之大豈酣酣者所能治邪何之律令豈古聖人所用  
以治天下者邪而參守之自以為足後世亦從而賢之  
予不知何說也且田制經籍學士大夫皆廢滅於秦是  
教養斯民之道皆缺也易解之彖曰無所往其來復吉

謂天下之難既解則當復先王之道當參之時天下已  
定七八年時非無賢也參雖武夫苟能親賢納善夙夜  
以此為務為漢家萬世計則庶幾周公之業而遠賢拒  
諫沉湎于酒至酣歌與吏相呼此書所謂巫風卿士足  
以喪其家者而參居之不疑蓋武夫俗吏之故態非宰  
相所宜然也宰相百僚之表也使百僚皆慕效焉則天  
下當何如哉予意當時天下之所以安者蓋民苦秦虐  
久矣而幸漢之寃故恬然自安於下非有道以維持之

也然則參雖能清淨不擾要亦苟且偷惰之為耳周公  
之罪人也大人之義當以周公為正



抑菴文集卷七

欽定四庫全書

集部  
抑菴文集卷八

詳校官編修<sub>臣</sub>裴謙

中書<sub>臣</sub>劉源溥覆勘

總校官進士<sub>臣</sub>楊懋珩

校對官典簿<sub>臣</sub>劉景岳

謄錄監生<sub>臣</sub>費元震

欽定四庫全書

柳菴文集卷八

明 王直 撰

墓表

劉君墓表

君諱觚字士方泰和珠林里人世為儒家自宋以來科第顯者累數十大父快軒先生宗榮在元為本州儒學訓導伯父禮部侍郎崧父豐城教諭子彥皆以雄才奧學知名君隨父官豐城時方十歲已能作詩日誦書數

予言賓客有問即應對如響當時大奇之甫弱冠遭父喪即侍母歐陽孺人奉柩歸泰和送死事生皆盡其道而益肆力於學久之博通羣書為文思若決河復然出儕輩再以書經進於有司不偶則嘆曰親老乃汲汲於此邪遂不復出鄉之大族爭請君為師而歐陽孺人已有病君朝出暮歸往返二十餘里藥食衣物必親視所宜孺人卒葬祭必以禮一不惑於流俗劉氏族久且大先墓無遠近歲時必躬往省之有犯者必訴之官豪猾

知君貧欲以久困君而君氣益勁曰吾理祖宗墳墓可  
但已耶已之不孝也雖連逮數年必得直乃已由是人  
莫敢犯尤篤於朋友以道義相錫切然性素剛人有不  
善面折之或拂衣徑去以故人多憚君然論鄉邑賢者  
必曰劉君劉君云君負才具嘗論及為政設施措置多  
出人意表然不苟求仕進縣庠訓導常缺論者獨於君  
為宜然欲君且少貶君聞之曰訓導當以道義教諸生  
師嚴然後道尊顧可自貶以徇人耶自貶以徇人唯餘



子能之吾則否衆益憚君不敢近然君亦不以屑意予  
與君自少相從講學最相知而翰林侍讀梁先生用之  
亦雅重君之賢數欲薦之然聞君有疾不欲出故不果  
薦凡賓興之歲諸藩省請考貢士皆不就以永樂己亥  
十一月缺日卒于家年四十五其葬在其里嘉湖之原  
娶羅氏子男五人準登宣德二年進士第嗚呼昔者聖  
人之論君子也蓋曰義以為質則君子之所為視義之  
可否而已義所不可雖千駟萬鍾弗顧也況其下者乎

然而喜事者乃或至於屈已以求之幸而得焉則侈然自以為賢孟子所謂齊人之可羞者也而世之論人者好以窮達得失為賢愚若彼者皆其所賢者也是亦齊人之類也此庶恥之所以喪而士氣之所以不振也若劉君非篤義之君子與是足以表見於後世矣故論著以授準使歸而鏡諸石

南溪蕭處士墓表

泰和南溪蕭季廣與其弟季哲季敏季運以永樂二十

一年十二月二十五日改葬其父處士君於龍門口之  
原葬已相與謀曰吾父不幸棄諸孤今體魄既安矣惟  
其德善未有文以表諸墓將何以傳示永久乃使姪釜  
奉書幣來北京請予文以饒諸石蓋君嘗從予先祖竹  
亭先生學而編刻其詩以行於世又嘗請予教其子孫  
於義為最厚宜其請於予而予不得辭也君諱輦字鵬  
漢其先長沙人楚軍巡判官覺之裔曾祖南山祖蘭谷  
父北山皆不仕而皆以德望一鄉君少端重喜學家雖

富不為慢戲佚遊躬行孝弟衍衍如也父嘗病疽疽浸淫內潰勢幾殆君屢齧吮之手注善藥晝夜躬調視疾遂愈未幾母疽發亦如之君同產及從兄弟五人鵬舉鵬起鵬南鵬翔而君最少相友愛甚篤君又恭順不懈庭前生紫荆五株同本君子以為和氣所致於宗族親戚處之各適其宜交朋友重信義周人之急切於為己與人處未嘗易其言言之必當於理至於論事成敗計利害所宜必曲盡竒中人有未善輒從容開諭使為善

於已有忤不校也君貌厚氣溫而才行如此衆以為宜  
在官位永樂辛卯被薦至京師以疾辭歸卜居武陵橋  
挹武山之勝性不嗜酒然客至輒傾倒相歡攻於詩得  
唐人冢法而亦不自銜時時發於咏歌以娛情寫物取  
自適而已永樂十七年四月十八日客于洪以疾卒年  
六十二娶宗氏有賢行子六人季厚季高早卒今存者  
四人皆能繼君之志孫男十三人某某曾孫男三人某  
某予觀先王之世以德行教天下而天下之人皆興於

德行故成周之盛比之唐虞及其後世教道廢而風俗  
衰至於秦極矣迨漢有石氏楊氏唐柳氏宋戚氏皆世  
其德義以孝友稱至今豈非垂範取法兼盡其道歟予  
聞北山翁與鵬舉君嘗以賦役罹法爭就遠義聲動當  
時至君而施於父子兄弟又篤厚如此凡人守一善有  
不能終其身或至於子而遂失之者多矣蕭氏已再世  
矣是固可法也使其子孫謹法而不渝一鄉之人皆化  
焉則君之善豈不益大哉予故表而出之使揭於墓上

魯府紀善梁先生墓表

魯府紀善梁先生本之以宣德九年七月一日卒於官年六十五其子泰和縣學訓導栗與弟樞奉葬於其鄉某山之原少傅兵部尚書兼華蓋殿大學士楊先生銘其墓矣栗又請予文表諸墓上蓋少傅公與予皆其姻家也義不可辭先生泰和柳溪人自少博學於經傳靡不通始為端州府學訓導秩滿陞溧陽教諭以外艱去服闋改納溪蜀王聞其賢舉為紀善丁內艱既除改魯

府紀善先生有英邁之氣忠厚之資其勤於教誨謹於  
輔導言行之善者蓋多皆其職所當為不可得而備書  
也姑述其可以垂世勵俗者蓋先生事父哇樂母陳安  
人極孝敬凡所以養其口體順適其志意者事無大小  
必盡其道至於祿俸餘貲皆以歸於親一不為私蓄計  
事其兄翰林侍讀用之怡怡恭順未嘗有所忤父沒家  
政舉歸其兄嘗自念惟一子而兄子四人田廬當均給  
諸子其兄則不欲有所輕重卒兄弟均分之其內皆化



無彼此言者從弟洞內弟陳賞皆早孤先生皆教之有成賞一子异先生許妻以女賞出為廣西按察僉事以卒异貧無貲產或謂先生於姻事將何如先生曰异雖無地其上獨無天耶卒妻而厚撫之親戚有以田質錢者久之不能贖而貧益甚先生還其券俾得自資先生又有地適曾氏曾氏僦而耕者數十年累納僦直先生以其同業儒又連姻婭義不受且欲割以畀焉及曾氏孤且貧先生念欲振之曰斯地也吾心許久矣即自書

券往授焉使食其利其在端州人有死而貧不能葬者  
輒出錢率衆葬之窮民無告者輒周給之與人處能輔  
以義有所未至輒面斥其非人或不能堪不顧也及其  
復於善即相接怡然人是以樂親之嗚呼先生之德如  
此古所謂治教之本也而不究於用今已矣豈非可惜  
哉世之號美才者多矣其於書非不讀也而行或異乎  
是蓋有悖其父兄簡其親戚欺人之孤遺而長人之惡  
視人之死喪困急而恬不知省者其於仁義何如也夫

風俗之所以厚賢才之所以興起蓋由賢者表勵之也使先生老而歸鄉之良子弟有所視法而益勸於善則風俗之厚賢才之興當益盛乃今不可作矣嗚呼安得復有如先生者哉歲月易邁流風餘韻將久而忘之故特書其可以垂世勵俗者使歸鑒諸石以示來者

王處士墓表

泰和多故家南富王氏其一也其先太原人後徙廬陵之何山又徙安成之連嶺至宋諱明遠始徙居泰和以

詩禮名家宋末有為學諭曰仲鴻者生興祖篤學而好義受知於信國文公公為書續槐精舍四字榜其居以勵之世亂弗克有為學諭生廷珪廷珪生處士諱天迪字功迪少讀書有大志新作一室揭信公所書朝夕勉焉欲有立於世其言必依於孝弟忠信而行亦如之值元季不果出時所在多盜起處士乃傾貲結客以保障鄉里人賴之皇明混一可以行其志而處士老矣會詔下覈民田或誣處士失實盡沒入其貲產處士不能自

白則嘆曰命也而未嘗有怨尤惟訓其子以德義治身以勤儉治家而已久之家復裕國初徵稅一邑擇一人有才行者摠徵以輸于府衆盡推處士任數年稅以時入無纖毫過差貴賤賢良皆譽之其治已嚴重而臨事寬平從容進退表然為鄉之望其奉祭祀待賓客必以禮人有未善則容而教之嘗與誣者相接不少見色辭人尤服其雅量洪武甲子閏十二月二十二日以疾卒距其生元大德癸卯之歲享年八十一娶郭氏子男二

思齊思賢女一嫁

缺

孫男五守一守訓守貞守敬守

恒曾孫男十有一純經維統繪緒綬緇緝緋經開封  
府學教授維蕪湖知縣綬萊蕪知縣處士初葬其里之  
乾溪後改葬萬安縣誠信鄉湖口之蓮花洲葬已五十  
年而墓石尚未有文至是維自蕪湖來北京以前國子  
助教歐陽先生所述處士行狀謁予曰維曾大父實有  
德善鄉邑罔不聞今前輩長老凋落殆盡而知者鮮矣  
非為文以刻諸石恐久遂湮泯敢以請於先生予謂先

王之世君子之所務者義與命而已故曰君子義以為質又曰不知命無以為君子惟其務此是以於事之當為者勇為之橫逆之來苟非其所自致者受之而不報以待夫天之自定也後之君子不明乎此於其所當為者或不為有所不得則盡其智術以逞於一時卒陷於不測而不悔此孟子所謂匹夫也若處士者其可謂安於義命之君子矣子孫之福至久而益盛者天定故也若是有不可表耶故為書之使刻諸墓上

袁叔異墓表

安吉縣學教諭袁君諱同字叔異洪武丙子卒於官明

年二月歸葬於泰和縣西之凡山不吉又以永樂

缺年

改葬于

缺

原又

缺

年其子範乃來求予文表之墓上按

袁氏之先自金陵徙泰和世有顯人至君之曾祖惠窓

祖拙餘父彥正皆不仕然皆有學行為人師君生而穎

敏喜讀書日記千百言稍長徙鄉先生陳心吾受易經

入鄉校為弟子員凡在學者皆莫能先君為文章宏肆



奇偉而言論馳騁開合不窮語嘗傾一座其事父母處親戚朋友油然愛敬之施學成貢入太學由太學出奉使浙江藩府大臣皆稱以為能歲丁卯領應天府鄉薦明年授安吉教諭能以所學教諸生其浮詭不法者君以一語折其心皆帖帖為善良故學者多所成就君之才通練足以有為其在安吉於廟堂學舍解宇及器用小物靡不整齊完好人謂君小試乃如此使其大用可知而不幸已矣其卒時年纔三十四嗚呼天之於君何

其若是哉自古大賢君子負傑出之才而不試於用者  
不少若君猶得為教官以少見其才而人之能如君者  
又少也蓋其隨俗變化夷高以就下上無以教下無所  
承式然則如君者可勝惜哉使君尚在而當佐理之寄  
推其所施者而大施焉則人將無遺利矣而乃止於此  
豈非命邪雖然賢者必有後天之道然也故君之子範  
以才俊稱於人今又為邑庠生將復進於顯榮以食君  
之報而且汲汲以顯其親以予文之不美其何足以稱

孝子之心哉然不可辭故論次之而使鑱諸石

都察院右僉都御史凌君墓表

宣德九年八月十五日中順大夫行在都察院右僉都御史凌君晏如以疾卒於官年五十三朝廷為遣舟歸其喪于湖州歸安縣將葬于所居琅琊鄉缺山之原其幼子啓既請右都御史熊公銘其墓矣復來請予文表諸墓上曰啓之兄敬以養祖父不克來京師今歸有期亦不能俟其來也故啓敢以請凌君嘗入翰林與予接

又同朝久且相知義不可辭君諱安然字晏如自少力學問尤工書其楷書學晉小篆則師秦相早有名鄉邑太宗皇帝銳意文藝必欲追配古人君優游館閣益自勵務欲稱上意仁宗皇帝在東宮雅知之常令繕書以進今藏於祕府永樂十五年擢拜吏科給事中以恭慎舉其職日侍上左右有所顧問敷奏詳明同輩皆推服焉仁宗皇帝即位陞吏科都給事中益恭懋不懈人未嘗見其過舉今天子即位三年大正庶官以脩百度以

君為右僉都御史蓋是時持憲者多以賄聞由是用君其間君感上知遇確然自守不為衆所惑思欲稍拯其弊事有不可即懇懇為其長言之多見聽從然猶膠筏牢密君未及有所振舉而以內艱去蓋在任不二年君去而其長及凡相託者皆得罪矣服闋仍為右僉都御史兵部以武職貼黃久不清請會官清理如故事上以命君君與翰林侍讀苗君衷皆從事於此同力一心罔有漏失有顏鎮撫既卒子孫當一人繼乃復以一人冒

官三十餘年無覺者君閱其實乃奏罷一人又著令凡武官有靖難功而無子者不忍遽絕其祿得以壻或義兒一人繼不再及也有張指揮者既以義兒繼矣又欲冒及其子因有所調發託統帥以疾言豫以子代亦十餘年矣君亦奏請罷之其臨事用心不苟皆此類而不能久於世豈非可惜哉曾祖缺祖德皆不仕父彥能歷官至應天府通判坐累罷居均州仁宗亦知其為人因君為都給事中即命冠帶造朝以都給事中致仕歸湖

州今加封右僉都御史君初娶周氏早卒有一子曰敬  
再娶唐氏四子曰啓肇敦敦於乎自古聰明才俊之士  
遭時奮身皆有志於功名以顯當時傳後世然而不至  
於大有建立而卒如君者何限盖莫非命也使君而得  
永年其所立豈小哉今雖不幸而其居官行事之善不  
可以泯也故表諸其墓

楊處士墓表

泰和楊處士從進以永樂十二年

缺月

缺日

卒于家年

欽  
十  
年  
月  
日  
欽  
日  
葬  
千  
秋  
鄉  
過  
路  
塘  
之  
山  
下  
後  
十  
八

年其配郭氏孺人年八十亦卒祔于處士之墓又七年  
為正統二年其孤子珩子珵子珮相與謀曰父母之葬  
既有銘以納于墓矣若又表其德於墓上豈不益明顯  
而延聞于世乃以書幣來北京請予文將以刻諸石子  
珩子女兄之夫而子珵子珮皆有連子雖不得辭然縻  
於職務未有以復也久之子珮又以書來速文曰子知  
吾親宜無愛於言乃著其實俾揭焉楊氏故大家而族



屬最繁處士世居汝南坊號上園楊宅曾祖某祖某父某雖不仕然皆富而有文有元之季盡失其故業處士恭儉勤慎務不辱其先言行必由於禮義初娶東門劉氏賢而有婦道處士思再造其家實克相之劉孺人卒處士求同德以成其志遂以郭孺人繼焉郭氏世居縣西之大溪孺人則柳溪之曾孫景宣之孫才卿之子也資稟端重色溫而氣和歸處士尤謹於內助處士孝念其親必盡誠相祀事其撫育孤姪則加之以恩親賓往

來處士歎洽於外孺人治具於內必潔以豐歲時饋遺  
輕重疏數必適其宜撫異母子如己子衣服飲食必均  
所以訓勵之者亦無彼此之殊處士勤於治生產業日  
盛而孺人樂儉素未嘗侈費一錢以故家益裕皆處士  
之志而孺人成之也處士既卒三子因其所遺各置別  
業於西鄉孺人亦厭城市喜田園板輿迎奉極甘旨之  
養鄉人以孺人有福而其子能孝莫不譽歎焉處士三  
子子珩子城劉孺人之子子珮郭孺人子也女八人皆

有歸孫男七人維繼綸纓緝純繼領鄉薦為河內縣教諭今已卒孫女九人曾孫男三人憲慮懋嗚呼元季兵亂以來大家世族之淪喪者多矣高門大宅廢而為丘墟子孫亦降為輿隸至或湮滅而無聞其能脩復舊觀如上園楊氏者誠少蓋由處士之孝不墜其世業而又有孺人之賢以為之助也生既同勤以成其家死又同葬以安其魄則皆表著其行而使同不朽焉豈不宜哉故為次第書之使後之人有則也

處士胡公墓表

處士胡公諱環字子巖泰和社溪里人社溪之胡分自黃漕蓋南城丞箋之裔宋季有文可者徙文丞相勤王卒死於其事文可子南叔以平溪洞勞得巡檢南叔生建德主簿履翁履翁生守良守良娶顏氏而生公公性孝友父母年皆八十公善事之得其懽心伯父守禮無子公事之如父父母沒葬祭無違禮而哀慕久不衰其同產惟一姊公極愛敬至割田以奉之又待其從姊如

同產事族之長者以禮而處衆人以和歲時祭享及冠婚喪葬一皆盡其道其有不給者賙之祖業墳墓勤於展省非有故必自行於延師教子甚切每出貲以倡族人內外屬子弟有願學者皆受之使學諸子所為稍涉非義即厲色訓戒必改乃已赴人之急不啻為己人有假貲無不應或不能償不責也待姻戚以義交朋友以信撫下人以恩接鄉黨以誠當時名士顯人有過公者公敬禮尤至諸公亦甚愛公必相與懼洽傾倒然後去

晚年付家政于子而放意山水間超然自樂也宣德乙卯十月十三日以疾卒年七十五凡知公者皆哀惜之明年十月初五日葬其鄉禾坑之原娶永新蕭氏有婦道先卒子四重簡重連重通重宣女三嫁嚴希齡蕭鉉蕭建亮鉉為翰林編脩孫男十人曾孫男二人編脩嘗謂予言鉉外父實有淳行而以隱終吾妻慮其善之不傳知鉉辱愛於先生屬請文表其墓予未暇作今年重宣來北京申諸兄之言而泣拜以請因憶往年過金臺

訪予姻家嚴君誠仲公來顧予得拜焉觀其容貌作止而聽其議論信所謂隱君子也夫一鄉有君子則一鄉之人皆興於為善有以成賢才美風俗雖使久生於世而不厭今公已矣豈獨一鄉之人惜之雖予亦深惜之也其為人如此豈可使無傳哉況公賢子重宣以請于予而予之姪復又重宣壻也誼不可辭故序其實使刻諸墓上

李處士墓表

處士李公字又新世居泰和文溪里與予家相距不百步而長予二十年最相好其卒葬已久矣今年孫誠來北京奉其父懷慶太守湘之遺命謁予曰先人疾既彌留呼誠告曰爾祖墓石未有文吾深以為歎知其善者惟侍郎王公吾嘗請表於墓上則既許諾矣我死爾以吾言為請而刻之則吾目瞑於地下今吾父雖沒而言存敢以請拜且泣予為之惻然曰爾祖孝弟人也予知之不可使無傳于後世宜爾父子之請于予也公曾祖



仁可祖宗明父雲龍皆不仕而皆為善人長者母蕭氏  
前進士子上先生之姑賢而有家法公既受教于家外  
則從良師由是能善其身與予游時年已四十餘矣而  
母尚在堂朝夕奉其起居承候其顏色調其衣食寒煖  
之宜或有不豫則惕然以憂躬治湯藥而敬進之不暫  
去左右勿樂而後喜可知也兄可成惇厚樂易公事之  
無違禮凡言動不敢先均憂樂通有無於事當圖議者  
則從容和順唯兄命未嘗有乖其諸所行必皆審於理

不肯稍涉非義豪傑之徒相時射利舞文飾詐以陵人  
與凡擣蒲博奕俳諧聚醪之娛皆不與唯故人親戚有  
急則必赴經營佐助曲盡其方殷勤篤厚之意非衆人  
所能及嘗作肆居善藥戒諸子曰此非獨為利亦以市  
義必平價以售有急而無貲者則貸之不責其必償其  
所以治家訓子孫無非理者湘從予遊縣庠訓勵之尤  
切其事師親友皆資給之使得如志以學故能有成立  
其行如此非所謂一鄉之善士歟永樂癸巳正月十九

日卒年五十六娶蕭氏有婦道子六人曰湘懷慶知府  
曰浩固安教諭孫男二十人曾孫男九人公初葬里中  
窀穸祖墳之次以其地不言諸子孫又將以

缺年缺月

缺日遷于缺

之原而樹表墓上於乎人道莫大於孝弟

蓋所謂德之本也世之人乃謂不足為惟逞志於所得  
為借獲取帝而狼戾之惡滋紆臂閱牆而陵犯之風作  
如是而欲刑其家封植其子孫可得耶公敦行孝弟而  
又推以及人雖不至寵榮而諸子享其福此德之應也

懷慶至死猶不忘顯親之孝又有孫若誠者切切焉以  
成其志皆公之德善實啓之以是而鏡諸石足以垂耀  
於後且不獨勉李氏之子孫使世繼其美亦欲使觀者  
有所興起云

嚴氏兩處士墓表

嚴氏兩處士泰和人伯曰元齡仲曰元晏皆質直坦夷  
端厚周慎非其所當言者未嘗出諸口非其所當行者  
未嘗發諸身凡智術機巧衆人夸詡以為能者未嘗形

於念慮至於聚博釀飲慢戲佚遊之事亦未嘗厠跡其  
間讀書為善思不忝其世洪武初儒道浸盛元齡甫以  
所學施教于里中里中子弟多從之者有司聞其無害  
舉為吏處士曰吾士人顧可為吏邪不就強抑之遂避  
去有司怒其忤已置名案牘中益求之不已處士益自  
悶不與世相聞稍稍出遊四方久之得免歸鄉里與親  
戚故人相款洽其言行不異於曩時勤儉自足無一毫  
外慕意盖嚮嚮然樂也永樂丁亥

缺

月缺

日卒年

缺

十

殞所居東之魚池上元晏甫初與兄同居縣西鴈塔巷  
後迺徙金臺山中既攻儒書又喜治醫術以濟衆與予  
先公篤誼如兄弟其制行又高而言必顧行一鄉之人  
服其教被其澤縣令洪俊敬信之如著龜屢託以事無  
不當於理者隣邑民嘗作亂朝廷遣襄城伯李公率兵  
討之公亦知處士賢用其言良民免於俘棄而全其室  
家者不少平居賑窮恤匱解紛釋難尤多永樂戊子十  
二月十七日卒年五十五葬五十一都方橋東岡之原

嚴氏之先自金陵徙泰和世以宦學顯而又以貲富有  
名宋元之亂盡失之惟儒業不廢處士祖存忠不仕考  
尚德萬安縣典史母胡氏兩處士實同產元齡甫娶王  
氏直之姑生二男子敬仲仁仲一女子嫁劉士高再娶  
劉氏生一子晚仲孫男一元晏甫娶胡氏母黨也亦生  
二男子誠仲文仲二女嫁黃丕烈劉伯遡孫男六誠仲  
敬仲兄弟謀曰惟吾二父相友愛甚篤非他之為兄弟  
者比嘗恨遭變故不得與同處今不幸已矣其可使終

異耶乃舉元齡甫之喪亦葬于方橋東岡之原同域蓋  
欲其有以慰悅于地下則缺年缺月缺日也鄉人過者  
皆曰此嚴氏兩處士之墓必致禮而後去至是誠仲兄  
弟同以書來京俾直為文表諸墓直念幼時常得侍左  
右聽其言觀其行凡所以教者必本於孝弟忠信盖用  
其所有者迪後輩藹然古君子之風至于今不忘以直  
之愚其何能光昭令德於久遠哉然不敢辭也姑述其  
槩俾揭于墓上



劉氏歸仁阡表

劉氏於寧都為大家其曰宗仁號靜山者則其族之傑  
然者也靜山之曾大父景新大父友貴父文福皆不仕  
而皆以忠厚聞鄉里靜山生而英偉喜讀書未嘗慢戲  
佚遊鄉先輩皆器重之長而才識益充善剴繁治劇公  
私諸事皆自任不以煩其親朝夕敬養父母之心懼焉  
親沒祭葬無違禮課童奴治產業勤儉自持家日以裕  
性尤剛毅守禮法遇事必公其是非不曲隨苟止親賓

過從論政務究物理語嘗屈其座人人亦莫有間然者  
兄弟相與怡愉和樂盡友恭之義自以早年廢學見幼  
弟本穎敏延名師教之遂以儒業聞縉紳間嘗掌其鄉  
糧賦及領千夫入湖湘伐大材輸京師撫下有方人人  
樂從故不擾而事集晚讀老子好清靜聞武當山天下  
奇勝神人所棲止遂往遊焉徧歷諸岩洞冀有所得恍  
惚遇異人授以道要悟而歸退居西澗之阿超然有出  
塵之想一日微疾諸子侍側惟勉以孝弟不及其他語

畢而終永樂廿二年五月十八日也享年五十九宣德

元年

缺月缺

日葬歸仁里高屋上之原配孺人王氏諱

瑤直之從姑也蓋曾叔祖用則公於洪武初為寧都訓導因家焉生從祖子才娶嵇氏而生孺人柔慧淑善閑於女紅父母愛之為擇壻得靜山遂以歸焉時有姑在堂老而病孺人事之小心敬慎嘗先意承志姑喜其孝稱之六親凡靜山之事親處兄弟睦宗族惠於鄉黨隣里皆能成其志王氏無主後墳墓孺人皆主之祭祀展

省各以其時而哀慕加焉治家謹肅訓諸子孫女婦皆有法內外秩然靜山沒後二十年素服終其身正統九年八月二十六日卒年七十八子男五讀書循理克承其家女一孫男二十二人女十一人以缺年缺月缺日祔于靜山墓右於是諸子謀曰吾父母皆有令德宜表墓以昭來世庶幾永垂不朽乃遣澄來北京以鄉先生黎達所述行狀授直屬為文直嘗聞司訓公家寧都而嘆不得訪其後前四十年直濫官翰林而靜山實來京

始得拜而問焉傷其再傳而遂已然猶幸有姑在且靜  
山篤誼君子也庶幾墳墓有所託今皆不幸已矣豈特  
劉氏失其所以為望者而直之心亦安能不盡然以悲  
而惘然自失邪為文表諸墓以彰其德於無窮直安得  
辭作歸仁阡表使刻焉

故禮部主事龍君墓表

龍氏居泰和甘溪為大家世有顯者至君曾祖以傳祖  
明遠父仁安皆不仕而皆以行誼稱於鄉君貴乃得贈

父為承德郎禮部祠祭主事母湯氏封安人君諱槩字叔槩端重穎敏喜讀書為鄉校弟子員夙夜不懈凡所著述務出新意朋輩皆推其能永樂甲午以詩經領鄉薦然篤於養親不果仕所居湫隘不足容衆以父命作室先廬後日奉親娛樂其中二親沒喪葬皆盡禮而與諸弟友愛尤篤貲產隨所欲得皆讓之無吝意鄉族故舊有急賑之恐不至人有爭辨不直者多求直於君會試不偶入太學甲寅有祠祭之命宣廟上賓奉行喪禮嚴

慎無缺失人以為難今上初即位海外諸蕃國皆來朝  
事畢而歸擇廷臣知大體善撫馭者送之廣東宴餞而  
遣之君奉命以行宣布天子德意人人感悅已未調儀  
制主事當朝廷清明稽古右文君敬恭將事衆以為善  
於其職禮部每會試天下士簾內外執事最切者必以  
命君壬戌試畢當出院君得風疾輿歸治療久弗愈君  
嘆曰吾年已六十而病如此豈可以不去吾其歸哉即  
上章乞致事上許之既優游田里有以樂其心而無勞

於其身疾稍間未嘗一出至縣城惟教子孫以讀書為善兄弟相與恭愛隆然既而二弟叔昭叔鉉相繼卒君哀傷不置疾復作以正統丁卯十一月初五日卒年六十四初娶蕭氏靖江長史用道之女封安人再娶曾氏翰林庶吉士與賢之女以子文貴封孺人皆有賢行子男二長熙次文皆蕭氏出君在祠祭時文已取進士為中書舍人日與君同朝時人榮之既滿舉為吏部驗封員外郎今熙亦舉明經得泰和縣學訓導歸未至家而

欽定四庫全書



柳菴文集  
卷八

二十六



君卒矣女三嫁嚴恒楊漢者皆已卒其三適蕭恢餘未  
行孫男五曾孫男三文聞訃慟絕將歸治喪詣予告曰  
文兄弟二人而文早竊祿京師兄熙今亦忝教職當先  
人疾亟時皆不得奉湯藥既卒又不得視殯斂不孝之  
罪大矣惟其德行之懿若不能表著於後世使永永不  
朽則其罪益大將無所容敢請文以表於墓上予與君  
婚姻家自遊鄉校時已奇君及官翰林貳禮部君之言  
行接於見聞無非予所愛者蓋嘗以遠大期之其後予

知貢舉君在試院實助予孰知由此而竟以病去嗚呼  
今則已矣其可復得哉然君有令子汲汲以顯揚為事  
此可見其德之致故為序述而使鐫諸石百世之下欲  
知君之賢其尚考於斯

先伯祖贛州府學教授王公墓表

王氏之先居金陵晉太傅導之後南唐吉州刺史崇文  
始留家于吉其從孫宋禮部侍郎贇又徙居泰和世以  
宦學為名家至君高祖虹溪先生字叔可曾祖芳洲先

生字本初祖天隱先生字性夫皆不仕而皆以文學德  
誼重於時考西山先生字民則元季為贛州路先賢書  
院山長遂家于贛州尤以博學多才顯名公其長子也  
諱在字子所天資粹美器宇宏深穎然出儕輩聖經賢  
傳諸史百氏之書靡不讀而皆能造其精微為雩都縣  
學教諭兵亂學廢國朝混一字內首詔天下建學育才  
擇賢師儒為教官贛守鄒奕以公薦江西行省會諸郡  
邑所舉百餘人試之公為第一遣之京師吏部試在優

等遂授贛州府學教授公端嚴以處已和易以接物其所為教因傳以求經由體以達用究物理之妙窮治教之源陰陽鬼神之奧禮樂制作之文博極古今議論精到學者有所據依以成其業贛之人才彬彬輩出既滿授登仕佐郎俾復任洪武甲子復開科取士公之弟子陸載許恒王本道嚴鶚皆以明經中其科明年取進士登朝籍人皆推公為善教而公老矣然猶誨人不倦士之貧者公常衣食之恩義兼盡他之為師弟子者莫及

也。贛大郡多才賢，且交廣所由道。凡仕於贛與士大夫過贛者，必謁公。聞公言，無不意滿而去。洪武庚午三月二十三日，以疾卒，年七十七。娶周氏，有賢德。子男一曰伯時，女一嫁泰和彭原德。孫男一曰善學，曾孫男五。公卒後二年壬申，葬贛城東望城嶺，其山已丙。其向戌乾鳴呼公之考，直之曾祖同母弟也。故直於公為從孫，憶四五歲時，公奉表詣京師，歸至泰和，舉祀先之禮拜，跽登薦，極其誠敬，謁天隱公墓，下涕泗交頤，感慕之情不

能自己直雖幼已慕公之孝見內外屬子孫循循誘掖  
惟恐傷之教之以孝弟忠信禮義廉恥諄復之誨出於  
至誠復見公之慈親戚故舊老者敬以待之少者謙以  
撫之閭閻細人拜公者必問所業加慰勉焉人人感悅  
又見公之從容中禮後稍有知可以受教於左右而公  
不可作矣及官翰林從今少師楊先生遊先生常言公  
淳直無華言行一致尤恬於勢利樂與人為善凜然古  
君子之風昔贛郡庠有彭生者家甚貧公每賙給之使

學後為御史請歸蒐輯熊氏故士卒勢焰熏灼禍福予  
奪在其手一郡震動見公執禮甚謹思厚報公數請所  
欲為公知其必以此敗諫沮之謝不與往來未幾果得  
奇禍又嘗發策以女媧鍊五色石補天事為問諸生不  
能對請於公公曰聖神之事固非後人所可知然以吾  
意推之天豈待補哉調和五行之氣彌綸天道之所不  
及使之確然有常而無間則人民育而品物蕃此易所  
謂裁成輔相之道也諸生何疑焉公之奧學卓識出於

常情之所不及類如此直生也後竊嘗慨嘆不得聞先生長者之緒論是以寡昧闇劣無以紹前人而思公益深至是善學罷高要丞歸田里遣子鍰來京師告直曰公之葬已五十餘年而墓前之石未有文此誠善學之責亦爾之責也爾其圖之嗚呼直豈能究知公之萬一哉姑取公門人興安令周永所述與直之所見聞而次第書之使歸而刻諸石

母舅歐陽公墓表





嗚呼是為直之母舅歐陽公之墓公生元至正丁酉七月初九日以今正統癸丑十二月廿三日卒年八十七直於是不勝其哀憶四五歲時先妣淑人棄背未幾先尚書公以事去當時直幾不能自立荷公之德以克至於今思欲報公而未能如志今則已矣直之心何如其哀也直初從公時年十三公衣食而教之書常置諸左右隨事訓切之使必循禮蹈義以毋辱其先直服膺不忘後二年遂去公而歸然所以趨善背惡不陷於惡者

猶公之教也公之德施於直大矣然無以報萬一則直之慙負豈小邪歐陽氏世居泰和縣治東公之祖復之有隱德世稱長者考日新先生為江都丞臨淄知縣其文學政事見直所為傳公諱淮字子白外大父卒時年十二從直先祖竹亭先生先考侍郎公學天資絕出時輩罕比學成去為人師時廬陵永和陳德星為女擇賢壻得公而館之故遂家永和永和之人爭禮為子師其脩於身以孝弟忠信為本而亦以此教人凡受公教者

皆循循為善良其所為文清新典雅師韓柳李杜諸大  
家尤工書得晉人楷法隱然名動一時四方士大夫過  
永和者必求教于公公俊典不羣有治才而不樂仕進  
泰州學嘗聘為訓導不就平生交游甚多惟少師楊公  
士奇侍讀梁公用之最莫逆數欲薦公公力辭曰吾施  
教於鄉教行即道行也奚必為政哉永和鳳岡精舍中  
祀聖人像每朔望公與諸儒必祇謁行禮畢進諸後輩  
相與講學焉至於老不衰殿堂有毀壞者脩飾之或侵

廟塋地必請於官盡復焉乃已永和儒風久而猶盛者  
公與諸儒之力也郡太守歲行鄉飲必禮公為賓人皆  
望而敬之至是乃以疾終孺人陳氏孝敬順祥於直有  
母德焉幸無恙二子儀倅皆為士女六人蕭原豫劉應  
魁徐榮昌于資介鍾士元蕭敏其壻也孫男三人性怡  
愉儀等以公卒之缺日奉葬於廬陵十一都南山之原  
自為誌以納諸墓而命直為文表諸墓上直既哭以受  
命哀傷之至言不能成章然不敢慢也昔秦康公送其

舅氏晉文公至於渭陽而作詩序者謂康公之見舅氏  
蓋如母之在焉直之心猶是也常恨相去之遠不得數  
見公每一念之而思母之心益切蓋不知涕泗之橫流  
也今公已矣終不可一見矣欲報之德亦無所自效矣  
則直之哀思有已耶蓋抱痛以終其身而後已也用是  
表諸墓既以著公之德亦以寫直之哀云耳

楊處士墓表

翰林編脩楊鼎既喪其父處士君葬于長安塔坡鄉之

先塋六年矣今年來謁予告曰先人之葬少保江陵楊公銘其墓矣然未有文表諸墓上懼無以昭德于久遠敢請之先生予與鼎有斯文之契不得辭君諱森字德姓其先華陰人後乃徙居長安久之又占籍咸寧居郡城之永昌坊曾祖孝古祖伯安父惟敬皆不仕而皆以德誼重鄉邑惟敬娶李氏實生君剛直簡靜不苟合於人事父母盡孝道博觀諸書而獨邃於陰陽術數以生年月日時所值支干推衍之決休咎有奇驗然與人言

必依於孝弟忠信大要欲人趨善以求福不肯徇俗好  
所居褊植花卉以自娛富貴利達不一動其意休閒無  
事婆娑獨遊或高視遠覽從容嘯歌翛然有塵外之趣  
嘗曰吾祖宗積德累仁子孫當有興者乃遣弟為學官  
弟子所以教導者無不至正統己未擢進士第二遂入  
官翰林士大夫皆稱君之善教弟之善學也是年十月  
初七日君以疾卒于家年六十六君初娶魏氏早卒無  
子繼室劉氏生二子長即弟次弟女二人嫁王楠吳英

古之君子不必皆貴且顯也要亦有所自立今君雖不  
仕而善足以稱於世昔淮南有處士征君以孝弟恭讓  
聞鄉里教其子取進士甲科荆國王文公以為一鄉之  
善士作文以表其墓至今數百年人猶知有征君者以  
荆公之文在也若君之美固不讓征君而鼎之賢所以  
顯揚光大者蓋未可量予文豈足以為君重哉姑為表  
其墓以俟

姚氏二親墓表



桐廬姚君惟善以永樂丁酉四月廿五日卒于家年四十四殯于里之文化山下宣德己酉二月廿五日禮葬其鄉寨鷄山之陽正統丙寅六月六日其配孺人申屠氏卒于北京其子吏科給事中夔之官舍年六十七夔兄弟奉柩歸卜以缺年缺月缺日合葬惟善君之墓而自為狀來請曰惟吾二親實有令德以保艾後人而先考乃早棄諸孤先妣劬躬盡節以教以育茲幸得祿可奉朝夕矣而弗克終養此夔兄弟所以摧慟而不能已

也今奉柩合葬庶少慰死者於地下惟其德善恐久遂  
沈泯願先生表於墓道俾永永不朽為幸大矣予嘉其  
孝故不辭君諱善惟善其字也曾祖定祖昂父伯華皆  
有隱德君姿貌豐偉襟度夷曠雖不拘小節而行不違  
道事父母以孝聞養生送死皆中禮節處兄弟極友愛  
伯兄嘗被役於官君請以身代雖勞不怨弟為太學生  
則厚資給之使學及令洛陽君遠嫌未嘗一徃視好仁  
急義出於天性鄉人楊甲父喪不能舉為治棺衾葬之

外女孫柴氏親沒無所依長育之使有歸其他賑貧乏  
卹患難施惠尤多與人言必依於忠信人有不平質於  
君則以理誨諭無不悅服皆稱為長者卒之日不聞疏  
戚愚良哭之皆哀孺人亦桐廬故家父文齋以行誼稱  
而與其母

缺

氏皆早卒大父母以屬冢婦俾善視之察

其賢且才喜曰使此為男子當大吾門而惜其女也然  
不宜與凡子年十五為擇壻遂以歸君事舅姑孝敬婉  
順能得其懼心祖母楊氏性嚴難事然獨喜孺人每舉

以勵諸女婦事君能相其志閨門之內肅如也君卒孺人纔三十六以貞靜自守而儉約持其家君初在殯未克葬每一念之輒哀慟欲絕逮葬乃已歲時奉祭祀處內外屬待鄉隣賓客皆適其宜訓諸子各務所業以不辱前人夔最幼親教之書遣入邑庠受學脫簪珥以為禮夜則秉燭以課勵之見其與賢者遊則喜不然則唏然怒曰汝父積善以遺汝蓋冀汝大有立而汝甘為不肖子邪夔於是自勉以底于成及官近侍迎養來京師

而猶子龍為刑部主事二子暮歸侍左右詢其職業隨事訓戒之皆合於理道在朝士大夫聞之莫不譽歎其賢孺人寡居三十載冰清而玉剛其善行達識又如此不賢其能是乎五子女一孫男十三女四古之大賢君子卓然有立於世者皆本於父母之賢然使俱存則其成易矣不幸而失所怙為之母者盖有慈無威然亦能成其賢者雖母之善教實考之德有以庇賴之也宗廬陵歐陽公是所謂大賢君子也表然為望於天下實由

乎母之教而君子必歸於其考之仁今觀惟善君與孺  
人所以積於躬而冀望其子者不異於歐陽氏然彼之  
能久而不泯以瀧岡之表在也予言何足以擬之然夔  
方盛年而進用未極其勉於德以顯揚乎親者當益大  
安知他日無若歐陽公者以為不朽之託哉姑論次之  
使刻諸墓上

故鬱林州同知張君墓表

張氏之先洛陽人五季之亂始徙家秦和宋熙寧中有

兄弟二人同舉進士曰汝賢為江淮發運使曰汝明為  
湖南觀察使皆有盛名而家益大有譜牒至君之曾祖  
君瑞祖文良父子禮皆不仕文良長身玉立言行不妄  
鄉稱善人子禮則謹於事親而勤以植家自少與翰林  
侍讀梁先生友善及君則又與先生之子侯官令叔蒙  
嘗同學有麗澤之益諱鐸字振文自邑庠生充貢入太  
學友天下之賢而學益進謙恭自持謹於禮度歷事兵  
部禮部俱以謹慎得名歲丙辰有鬱林之命鬱林甌越

地自昔稱僻陋之鄉其人知力田務本而秀民亦頗好讀書然風俗未盡淳君一以寬簡為治而民安之乃興學校申教條暇則躬詣明倫堂集諸生講論豐其供給蠲其徭役以課勵之由是諸生皆勉學以圖仕進民有兄弟爭訟者君諭以大義使退而自思往往不終而罷州南有廢地弗治君教旁近民使墾耕而食之曰吾不與汝稅也人知君意在利民凡廢地皆墾耕郡中幾無遺利於諸壇壝所以事神保民者皆治祭以時由是水



旱疾疫禱之輒應而民受其福田州人爭地相讎殺久  
不決藩省大臣知君可任乃委君及諸司所遣官屬往  
平之宣布天子恩德與不忍加兵之意按圖誌考故實  
俾各循其舊一毫饋賂不得行於是皆悅服而罷壬戌  
述職朝京師奏課在優等歸至郡得疾惟第三子志在  
側醫藥弗效志禱于神請以身代亦弗應疾革謂志曰  
爾幸領鄉薦宜益勉於學以顯親揚名毋怠言訖而逝  
壬戌八月十五日也距其生洪武丙寅十一月五日年

五十七初娶羅氏先卒繼室曠氏子男四女四孫男八  
人志奉樞歸兄弟卜葬於龍洲之南園以羅氏祔癸亥  
十二月廿二日也葬已九年志自太學選為南京刑部  
主事當之官來求文表墓上予與君同里嘗同遊鄉校  
而君少于七歲見其端重樂易每以遠大期之及述職  
來朝上其課心益為喜謂其福祿榮名蓋未艾孰知去  
不久而君已矣志之才器又有過人者今發軔仕途而  
即登郎署官六品天將以君之所餘者申錫之使於揚

名顯親而大發焉以成其志則君之德善足有徵於後世矣故表諸其墓

銘

忠孝堂銘

國家之興必有豪傑卓越之才達乎忠孝之大節者以翼昌運續世功然後能享高爵重祿以傳于子孫而延之久遠若太師英國張公其人也公之尊府河間忠武王昔事太宗皇帝于潛邱掌護衛兵其姿度雄爽知畧

超邁而武勇絕人最為上所親任及靖難兵起上每授以成算戰勝攻取無難者諸將皆敬讓之時公亦提兵從王王嘗語公曰吾受上恩思輔成大業以報殊遇爾當戮力一心庶幾如吾志古人以事君不忠涖官不敬戰陳無勇為非孝爾能盡忠乃所以為孝也公頓首受教獎率所部摧鋒陷陣所向有功未幾王薨太宗皇帝素奇公召而慰勉之俾以其兵自効曰爾毋忘爾父之志公感上之德與先王之教益自奮勵卒成大勲凡上

有所命南征北伐無不盡其心奇畧偉績載之信史功名富貴無出其右者迨事四聖小心寅畏前後四十年如一日公既受顯爵位師臣王亦膺隆命配享太廟此忠孝之報也暨脩先朝實錄公再為監脩今上皇帝緝熙聖學公實知經筵事敬恭朝夕從容進退凜乎儒者氣象嘗謂直曰先王以忠孝為訓吾既奉以周旋不敢失墜雖幸而有立然今老矣惟列聖之大德不敢忘於心而亦敢忘先王之舊訓乎因揭以名堂將終勉之且

使吾子孫登斯堂者亦思所以繼吾志日夜勉焉盡心  
於其職庶無負於國而亦不辱其先子宜為我銘直聞  
之忠孝臣子之大節天理之當然也誠能盡其道則必  
享福祿之榮而子孫保之昔者召穆公能嗣其祖康公  
之業有功於周宣王錫之圭瓚鉅鬯以祀其先祖又錫  
之山川土田以傳其子孫詩人歌之至今誦焉公嗣先  
王勲烈著於國家顯榮褒大實有累朝之錫命誠無讓  
於穆公而尤惓惓以忠孝自勉且以勉其後之人國家

有億萬年之慶張氏之福亦豈有窮哉乃為之銘曰天  
生斯民賦厥衷為子必孝為臣忠惟師英公德兼崇卓  
立宛有前賢風桓桓先王才且雄捧日直上扶桑東奄  
然馭氣超鴻濛祇率遺訓績武功披雲卷霧開晦蒙九  
霄奮躍攀飛龍宣威蠻貊靡不通明明列聖眷遇隆仁  
漸義洽恩豐彤紀勲旂常銘鼎鐘王亦顯祀升闕宮周  
家召虎庶其同孜孜夙夜懷謙冲揭以銘堂圖始終勛  
爾後嗣躋令蹤事君奉先益敬恭國家萬年福無窮

古樸子銘

雲南右參政浦城陳君遜字必恭始自進士擢陝西道  
監察御史以績最陞今官其言行皆法乎古於世俗紛  
華巧偽之習皆不涉於心人皆稱其古樸必恭亦因以  
自號其鄉友陳先生士希為予道之予嘉其志而欲其  
久而不渝也乃為之銘曰維古之人循其自然不斷不  
雕而淳德以全維後之士趨於巧偽愈肆愈偷而流俗  
以弊繫古樸子若此之懲維先民是程維大猷是經既



不說隨亦不矯激其言其行維質維直柏臺崇崇薇垣  
于于政罔不成民罔不孚嗟哉若人可以勵俗敬慎不  
渝以終爾穀

著存堂銘

著存堂者少保戶部尚書兼武英殿大學士永嘉黃公  
祀先之堂也初公之尊府少保公嘗闢所居東偏之堂  
以祀四代祖禰而以著存名之祭酒胡先生為之記然  
局於地勢祠堂之制未備其心蓋慊然弗寧至是公購

得鄰壤乃大作祠堂奉安神主而祀焉前後四十年父子相繼始克如其志蓋可謂難也已夫君子之於其親必有追遠之道焉親也者身之所從出辟水木之本源也於此而不致其情則亦惡乎致哉是故親之葬也則必反其神既祭以安之矣然而日以遠矣遠則忘之而孝子慈孫之心則未嘗忘也時至則思思之則必有以將其誠而祭祀之禮行焉是所謂追遠之道也然古之祭者自諸侯大夫士皆有廟庶人無廟則祭於寢禮也

後世以來廟非賜不得立而獲受賜無幾人故仕者雖有爵以榮其身而無廟以祀其親君子惜之新安子朱氏乃損益就中而定祠堂之制自庶人以上皆得祀其四代之祖禰其制雖異於前而禮則隆於舊厚倫美化之意於戲盛矣然非篤孝之君子則亦莫之能為也公之為此既本於朱子至其奉祭又一用朱子之書內齊其心外備其物盡其敬而敬焉盡其愛而愛焉故肅然如有見儼然如有聞聲音容色心志嗜欲不少須臾忘

之恍惚神明之在其上此著存之義而詩所謂思成者也公之篤孝如此蓋民之表也其俗之歸厚可知矣公既以胡先生所為記刻諸左壁而以書來命直曰子宜為我銘之直之從公舊矣誼不可辭也乃為之銘曰名家肇慶古陸終祠堂翼翼居南東前作後繼偉兩公成此締構蔚穹崇美哉四室儼在中列祀祖考甚嚴恭秋霜春雨心為恍籩豆簋簋潔且饌牲既肥腍酒旨豐孝孫裸獻肅儀容精誠昭徹相流通神靈來享陟降同懽

卷八  
忻醉飽靡怨恫散為和氣為祥風儲休委祉紛疊重宜  
爾後嗣久愈隆我作銘詩垂無窮

鐘銘

鐘之作官府以謹朝夕浮屠老子之宮以嚴祠祀而近  
世富室多置焉何居予既作祠堂以祀祖考諸子取嚴  
奉之意亦請置鐘予則兼取謹朝夕之義欲以警昏惰  
故弗拒因推祖考示教子孫之心而為銘曰有鐘在縣  
聲聞于天祠事則甚虔然惟德是先進脩之功夙夜當

惓惓若沈酣於麴蘖之毒恣肆於衽席之安雖殷殷聞  
闕而聽之藐然迷天理之途溺人欲之淵昏惰而弗悛  
既不可謂孝亦豈曰能賢則神將厭之而何福之有焉  
嗟爾子孫警惕弗愆勉而有成百世之傳

嚴氏鐘銘

嚴氏於秦和為大家其先自金陵來後有篤行君子曰  
主晏甫又徙居金臺山中二子誠仲文仲皆能世其家  
乃作堂祀先而鑄鐘庭下以供祀事予與有世好故為

銘之銘曰嚴氏之先來自金陵世有令德肆久彌興金  
臺之遷實玄晏甫孝友忠信不忝其祖二子克賢享祀  
益虔乃作祠庭鑄鐘在縣苾芬以薦朝夕具敬厥聲  
皇祖考是聽祖考來格無有怨恫右我孝孫福祿來同  
福祿來同孝孫有子永言保之聿配其始鐘聲孔延震  
越山川相以銘詩百世之傳

靜學齋銘

予友夏君仲昭早有志學問以自立於世雖居市廛之

中而益敏於學用漢諸葛武侯之語名其齋曰靜學取  
聖賢書讀之求其脩己治人之道而服膺焉學成登進  
士第致通顯揚歷中外三十餘年以行其所學士大夫  
皆重之今進為太常少卿用其敬慎以交神明而其名  
益顯皆靜學之效也然好學不忘故學士沈先生嘗為  
書靜學齋三字由是揭于齋壁而日勉焉少師蕭先生  
為作記而予與為銘銘曰惟古之人學以為己學之有  
要曰靜而已理原於天而賦於人惟靜則專乃積諸身



漢之武侯靜以成學知止有定企彼先覺不邇於邪不  
汨於私酬酢往來大小其宜越至于今千有餘載功業  
不忘德音猶在猗與仲昭心焉靡憍人之搖搖已則翺  
翺濂溪有訓無欲故靜豈但能賢亦可作聖始而寡欲  
馴至於無持敬不渝聖賢之徒

柳菴文集卷八